



ИНД - 92

Иргэний Нисэхийн Дүрэм

Аюултай бараа тээвэрлэх

Иргэний нисэхийн ерөнхий газар

ДҮРМИЙН ТАЙЛБАР

ИНД-92 нь аюултай барааг агаараар тээвэрлэхэд тавих шаардлагыг тогтооно.

ИНД-92 нь дараах эд зүйл, эсхүл бодист хамаарахгүй:

- Техникийн зааварчилгааны Бүлэг 1-ийн дагуу тусгайлан хасагдсан;
- Нислэгт тэнцэх чадварын, эсхүл ИНД-ийн үйл ажиллагааны шаардлагын дагуу агаарын хөлөгт байхыг шаардсан;
- Үйл ажиллагааны тусгай шаардлагыг хангах зорилгоор Дарга зөвшөөрсөн.

Энэ Дүрэм нь Иргэний нисэхийн асуудал эрхэлсэн Засгийн газрын гишүүний баталсан ИНД-92-ын цахим хувилбар бөгөөд зөвхөн ишлэл хийх зорилгоор хэрэглэнэ. Хүчин төгөлдөр ИНД-92, түүний нэмэлт, өөрчлөлтийн хуулбарыг ИНЕГ-аас, эсхүл www.mcaa.gov.mn веб сайтаас татаж авах боломжтой.

Мэдээлэл

Гишүүн улсуудын иргэний нисэхийн Дүрмийг сайжруулах замаар иргэний нисэхийн салбарт нэгдсэн нэг Дүрмийн зохицуулалтад шилжих Олон улсын иргэний нисэхийн байгууллагын 1992 оны 29-р чуулганы А29-3 тогтоолыг хэрэгжүүлэх зорилгоор, Монгол Улс болон Шинэ Зеланд улсын ИНЕГ-ын хооронд 1999 оны 5 сарын 6-нд байгуулсан “Техникийн Хамтын Ажиллагааны Санамж Бичиг”-ийг үндэслэн Монгол Улсын Иргэний нисэхийн дүрмийг боловсруулсан.

Өөрчлөлтийн түүх**Хүчинтэй огноо**

Анхны боловсруулалт	2001 оны 12 сарын 29
Нэмэлт, өөрчлөлт 1	2008 оны 02 сарын 29
Нэмэлт, өөрчлөлт 2	2009 оны 09 сарын 16
Нэмэлт, өөрчлөлт 3	2010 оны 05 сарын 07
Нэмэлт, өөрчлөлт 4 (Шинэчлэлт)	2018 оны ... сарын ...

Тэмдэглэл: ИНД-92-ын шинэчлэлтийг монгол, англи хэл дээр, NZ Part 92 A.2-д үндэслэн боловсруулсан болно.

Гарчиг

А Бүлэг - Ерөнхий зүйл	5
92.1. Зорилго	5
92.3. Тодорхойлолт	5
92.5. Нөөц	6
92.7. Тээвэрлэлтийн ерөнхий шаардлага	6
92.9. Хориглосон аюултай бараа	7
92.11. Үл хамаарал	7
92.13. Нисэх багийн гишүүд, эсхүл зорчигч	8
92.15. Барааг тээвэрлэлтэд санал болгох	8
92.17. Аюултай барааг саатуулах	9
В Бүлэг - Баглаа боодлын иж бүрдэл хийх, савлах, тэмдэглэх болон шошго зүүх.	9
92.51. Баглаа боодлын иж бүрдэлд тавих шаардлага	9
92.53. Баглаа боодлын иж бүрдлийн зөвшөөрөл	9
92.55. Савлалтад тавих шаардлага	10
92.57. Тэмдэглэгээнд тавих шаардлага	10
92.59. Шошгонд тавих шаардлага	10
С Бүлэг - Аюултай барааг тээвэрлэлтэд санал болгох	11
92.101. Хамрах хүрээ	11
92.103. Аюултай барааг тээвэрлэлтэд санал болгох	11
92.105. Аюултай барааны тээврийн баримт бичиг	11
Д Бүлэг - Үйл ажиллагаа эрхлэгч	12
92.151. Хамрах хүрээ	12
92.153. Аюултай бараа хүлээн авах	12
92.155. Хүлээн авах шалгалт	12
92.157. Агаарын хөлөгт ачаалах хязгаарлалт	13
92.159. Хоорондоо үл зохицох аюултай бараа	13
92.161. Ялгах, тусгаарлах болон хамгаалах	14
92.163. Ачаалах үеийн үзлэг шалгалт	14
92.165. Буулгах үеийн үзлэг шалгалт	14
92.167. Гэмтэл, эсхүл бохирдлыг арилгах	14
92.169. Халдварт бодис	15
92.171. Цацраг идэвхт материал	15
92.173. Хөлгийн даргыг мэдээллээр хангах	15
92.175. Ажилтныг мэдээллээр хангах	16
92.177. Ачаа хүлээн авах байрлал дахь мэдээлэл	16
92.179. Зорчигчид зориулсан мэдээлэл	16
92.181. Үйл ажиллагаа эрхлэгч аюултай барааг саатуулах	17
Е Бүлэг - Сургалт	17
92.201. Хамрах хүрээ	17
92.203. Аюултай барааны сургалтын хөтөлбөр	17
92.205. Давтан сургалт	18
92.207. Ажилтны хувийн хэрэг	19
Хавсралт А - Аюултай барааны сургалтын хөтөлбөр	20

А Бүлэг - Ерөнхий зүйл

92.1. Зорилго

- (a) Энэ Дүрэм нь аюултай барааг агаараар тээвэрлэхэд тавих шаардлагыг тогтооно.
- (b) Энэ Дүрэм нь дараах эд зүйл, эсхүл бодист хамаарахгүй:
- (1) Техникийн зааварчилгааны 1-р Бүлгийн дагуу тусгайлан хасагдсан; эсхүл
 - (2) ИНД-ийн нислэгт тэнцэх чадварын, эсхүл үйл ажиллагааны шаардлагын дагуу агаарын хөлөгт байхыг шаардсан; эсхүл
 - (3) үйл ажиллагааны тусгай шаардлагыг хангах зорилгоор Даргын зөвшөөрсөн.
- (c) Үйл ажиллагаа эрхлэгч, энэ зүйлийн (b)(2), (3)-т хамаарах, агаарын хөлгийн солигдох зориулалттай эд анги болон бодисыг техникийн зааварчилгааны Бүлэг 1-ийн Хэсэг 2.2-ын дагуу илгээснээс бусад тохиолдолд, энэ Дүрмийн дагуу тээвэрлэсэн байх ёстой.

92.3. Тодорхойлолт

Энэ дүрэмд:

UN дугаар гэж бодис, эсхүл тодорхой бүлгийн бодисыг таньж тогтоох зорилгоор Нэгдсэн Үндэстний Байгууллагын Аюултай бараа Тээвэрлэлтийн Экспертийн хорооноос тогтоосон 4 оронтой тоог;

Агуулах сав гэж битүүмжлэх аливаа хэлбэрийг багтаасан, бодис, эсхүл эд зүйлсийг хүлээн авч, хадгалахад зориулсан савыг;

Ачааны агаарын хөлөг гэж зорчигч тээвэрлэж байгаа агаарын хөлгөөс бусад, бараа, эсхүл өмч хөрөнгө тээвэрлэж байгаа агаарын хөлгийг;

Ачилтын нэгж төхөөрөмж гэж дараахаас бусад, багц ачааны болон агаарын хөлгийн чингэлэг, агаарын хөлгийн тортой ачааны тавцан, эсхүл агаарын хөлгийн торон бэхэлгээтэй хэлбэржүүлсэн тавцанг:

- (1) гадуур боодол; эсхүл
- (2) цацраг идэвхт материалын багц ачааны чингэлэг;

Аюултай барааны ангилал (Ангилал 1-ээс 9 хүртэл) гэж Техникийн зааварчилгааны Бүлэг 2-т заасантай ижил утгатай;

Баглаа боодлын иж бүрдэл гэж Чикагогийн конвенцийн Хавсралт 18-ын савлах шаардлагын хэрэгжилтийг бататгах болон агуулах сав өөрийн хадгалалтын үүргээ гүйцэтгэхэд шаардлагатай агуулах сав болон аливаа бусад бүрдэл хэсгийг;

Баглаа боодол гэж тээвэрлэлтэд зориулж бэлдсэн баглаа боодлын иж бүрдэл болон түүний агууламжаас бүрдсэн, савлах үйл ажиллагааны эцсийн бүтээгдэхүүнийг;

Гадуур боодол гэж хадгалах болон тээвэрлэхэд тохиромжтой, тээвэрлэлтийн 1 нэгж болгон 1, эсхүл олон баглаа боодлыг багтаахад ашигладаг баглааг;

Зөвшөөрөгдсөн гүйцэтгэгч гэж онц аюултай бодисыг зохицуулах тусгай зөвшөөрөлтэй этгээдийг. Зөвшөөрөгдсөн гүйцэтгэгчийн тестийн гэрчилгээг сорилын гэрчилгээжүүлэгч олгох ба 5 жилийн хугацаанд хүчинтэй байна;

Илгээх бараа гэж нэг илгээгчээс нэг цагт, нэг хаягаар нэг авалтаар авсан ба нэг хүлээн авагчид нэг хаягаар хүргэгдэх, үйл ажиллагаа эрхлэгчийн хүлээн авсан нэг, эсхүл түүнээс олон аюултай барааны баглаа боодлыг;

Оноосон нэр гэж тээвэрлэлтийн баримт, мэдэгдэл болон шаардлагатай бол, баглаа боодлын иж бүрдэл бүрд байгаа тодорхой эд зүйл, эсхүл бодисыг тодорхойлоход хэрэглэдэг нэрийг;

Савлах гэж эд зүйл, эсхүл бодисыг ороож хайрцаглах, баглаа боодлын иж бүрдэлд хийж битүүмжлэх, эсхүл бусад хэлбэрээр аюулгүй болгох чадвар болон үйл ажиллагааг;

Тогтмол илгээгч гэж дараах аливаа этгээдийг:

- (1) аюултай бараа үйлдвэрлэдэг, эсхүл ханган нийлүүлдэг ба тэдгээр аюултай барааг агаараар тээвэрлэхийг санал болгодог; эсхүл
- (2) аюултай барааг агаараар тээвэрлэх үйлчилгээг олон нийтэд санал болгож, зохицуулдаг;

Үйл ажиллагаа эрхлэгч гэж агаарын хөлгийн үйл ажиллагаанд оролцож байгаа, эсхүл оролцохыг санал болгож байгаа этгээдийг;

Үйлчилгээний агент гэж зорчигч, эсхүл ачааг хүлээн авах, ачих, буулгах, шилжүүлэх, эсхүл бусад ажиллагааг багтаасан, үйл ажиллагаа эрхлэгчийн бүх, эсхүл зарим үйл ажиллагааг түүний өмнөөс гүйцэтгэдэг байгууллагыг;

Шуудангийн эд зүйл гэж захидал, илгээмж, эсхүл дараах зүйлийг багтаасан, шуудангаар илгээсэн болон хүргэгдээгүй бусад эд зүйл:

- (1) хүргэсэн боловч, хүлээн авагчийн гарт очоогүй эд зүйл;
- (2) аливаа захидал, илгээмж, эсхүл эд зүйлийн агууламж.

92.5. Нөөц

92.7. Тээвэрлэлтийн ерөнхий шаардлага

(a) Аюултай барааг Техникийн зааварчилгааны дагуу ангилсан, баримтжуулсан, гэрчилгээжүүлсэн, тодорхойлсон, баглаж боосон, тэмдэглэсэн болон шошго зүүсэн ба тэдгээр нь Техникийн зааварчилгаанд заасан илгээх нөхцөлд байгаагаас бусад тохиолдолд, аюултай барааг агаараар тээвэрлэхийг санал болгох, эсхүл хүлээн авахыг аливаа этгээдэд хориглоно.

(b) Аюултай барааг Техникийн зааварчилгаа, эсхүл энэ Дүрмийн шаардлагын дагуу хүлээн авсан, тээвэрлэлтэд бэлтгэсэн болон тээвэрлэснээс бусад тохиолдолд, тухайн барааг агаараар тээвэрлэхийг аливаа этгээдэд хориглоно.

92.9. Хориглосон аюултай бараа

(a) Энэ зүйлийн (b)-д зааснаас бусад тохиолдолд, хэрэв тухайн аюултай барааг Техникийн зааварчилгааны дагуу агаараар тээвэрлэхийг хориглосон бол, аливаа этгээд, аюултай барааг агаараар тээвэрлэхийг санал болгох, эсхүл хүлээн авахыг хориглоно.

(b) Хэрэв Дарга тухайн эд зүйл, эсхүл бодисыг тээвэрлэхийг зөвшөөрсөн бол, аливаа этгээд Техникийн зааварчилгаанд өөрөөр тогтоогоогүй эд зүйл, эсхүл бодисыг багтаасан, аюултай барааны жагсаалтын 9, 10, эсхүл 11, 12 дугаар баганад хориотой гэж тодорхойлсон эд зүйл, эсхүл бодисыг агаараар тээвэрлэхийг санал болгох, эсхүл хүлээн авч болно.

92.11. Үл хамаарал

(a) Хэрэв тухайн агаарын хөлөг нь зөвхөн цагдаагийн зорилгоор үйл ажиллагаа гүйцэтгэж байгаа бол, цагдаагийн ажилтан энэ Дүрмийг мөрдөхгүйгээр өөрийн ажил үүргийн хүрээнд аюултай барааг авч явж болно.

(b) Аливаа этгээд, энэ Дүрмийг мөрдөхгүйгээр, Ангилал 1-ийн аюултай барааг агаараар тээвэрлэхийг санал болгох, эсхүл хүлээн авч болно, хэрэв:

- (1) тухайн тээвэрлэлтийг зөвшөөрөгдсөн гүйцэтгэгч зөвшөөрсөн бол;
- (2) тухайн аюултай барааг:
 - (i) зөвшөөрөгдсөн гүйцэтгэгчийн хяналтан дор тээвэрлэх бол; эсхүл
 - (ii) зөвшөөрөгдсөн гүйцэтгэгчийн өгсөн зааварчилгааны дагуу тээвэрлэх ба тухайн зөвшөөрөгдсөн гүйцэтгэгч нь аюултай барааны тээвэрлэлтийн бүх цаг хугацаанд холбогдох дэмжлэг үзүүлэх боломжтой бол;
- (3) тухайн барааг тээвэрлэх аюулгүй байдлын болон онцгой нөхцөлийн журмыг тогтоосон бол;
- (4) тухайн бараа нь:
 - (i) агаараар тээвэрлэхэд тохиромжтой нөхцөлд байгаа бол;
 - (ii) аюулгүй тээвэрлэлтэд зориулан хадгалж, хамгаалсан бол;
- (5) тухайн агаарын хөлгөөр, тухайн нислэгийн зорилгоор зайлшгүй байх шаардлагатай зорчигчоос өөр аливаа зорчигч тээвэрлээгүй бол;
- (6) тухайн нислэг нь хот, эсхүл суурингийн шигүү суурьшлын бүсээс зайтай хийгдэх бол;

(c) Аливаа этгээд нь зорчигчийн хоббид хэрэглэх зорилгоор, энэ Дүрмийг мөрдөхгүйгээр аюултай барааг агаараар тээвэрлэхийг санал болгох, эсхүл хүлээн авч болно, хэрэв:

- (1) тухайн аюултай барааг дараах битүүмжлэлгүй агаарын хөлгөөр тээвэрлэх бол;
 - (i) MCTOW нь 5700кг, эсхүл түүнээс бага;
 - (ii) орон нутгийн ИХНД-ээр үйлдэх нислэгт;

- (2) тухайн аюултай бараа нь Техникийн зааварчилгааны Аюултай барааны жагсаалтын зорчигч тээвэрлэж байгаа агаарын хөлөгт тээвэрлэхийг хориглосон жагсаалтад ороогүй бол;
- (3) тухайн аюултай барааг тээвэрлэх аюулгүй байдлын болон онцгой нөхцөлийн журмыг тогтоосон бол;
- (4) тухайн аюултай барааг нэг бүрчлэн таньж тодорхойлсон бол;
- (5) тухайн барааны аюултай шинж чанарыг хөлгийн даргад мэдэгдсэн бол;
- (6) тухайн аюултай бараа нь:
 - (i) агаараар тээвэрлэхэд тохиромжтой нөхцөлд байгаа бол;
 - (ii) хэрэв тэдгээр нь хоорондоо аюултайгаар харилцан үйлчлэх магадлалтай бол, тусгаарлагдсан байх;
 - (iii) зөв байрлуулж, хамгаалсан ба хэрэв шаардлагатай бол, нислэгт гоожих, эсхүл гэмтэхээс сэргийлж савласан бол;
- (7) агаарын хөлөгт зөвхөн тухайн аюултай бараатай холбоотой зорчигч тээвэрлэж байгаа бол.

92.13. Нисэх багийн гишүүд, эсхүл зорчигч

Аливаа этгээд, Техникийн зааварчилгаанд зөвшөөрснөөс бусад тохиолдолд, аюултай барааг биедээ авч явахгүй, эсхүл агаарын хөлөгт аюултай барааг бүртгэгдсэн тээш, эсхүл гар тээшинд зөөвөрлөх нөхцөлийг бүрдүүлж болохгүй.

92.15. Барааг тээвэрлэлтэд санал болгох

(a) Аливаа эд зүйл, эсхүл бодисыг агаараар тээвэрлэхийг санал болгож байгаа этгээд нь:

- (1) хэрэв тухайн эд зүйл, эсхүл бодис нь аюултай бараа биш бол, гарын үсэг зурсан дараах баримт бичгийг үйл ажиллагаа эрхлэгчид гаргаж өгнө:
 - (i) тухайн эд зүйл, эсхүл бодисыг нарийвчлан тодорхойлсон; эсхүл
 - (ii) тухайн эд зүйл, эсхүл бодис нь аюултай бараа биш гэдгийг мэдэгдсэн; эсхүл
- (2) хэрэв тухайн эд зүйл, эсхүл бодис нь аюултай бараа бол, С Бүлгийг дагаж мөрдөнө.

(b) Энэ зүйлийн (a)(1) нь:

- (1) шуудангийн эд зүйл, эсхүл
- (2) бүртгэгдсэн тээш, эсхүл гар тээшинд хамаарахгүй.

92.17. Аюултай барааг саатуулах

(a) ИНД-12-ын дагуу мэдээлсэн осол, эсхүл зөрчилтэй холбоотой, агаараар тээвэрлэхийг санал болгосон, эсхүл хүлээн авсан аливаа аюултай бараа нь Даргын саатуулсан бараанд тооцогдоно.

(b) Дарга:

- (1) энэ зүйлийн (a)-д заасан аль ч барааг задалж, үзлэг хийж болно;
- (2) сорилт, дүн шинжилгээ хийх болон нотлох баримт болгох зорилгоор агууламжийн дээжийг авч хадгалж болно.

В Бүлэг - Баглаа боодлын иж бүрдэл хийх, савлах, тэмдэглэх болон шошго зүүх**92.51. Баглаа боодлын иж бүрдэлд тавих шаардлага**

(a) Аливаа этгээд нь дараахаас бусад тохиолдолд, баглаа боодлын иж бүрдэлд энэ Дүрмийн шаардлага хангасан тэмдэглэгээ **хийж, шошго зүүж, баталгаажуулахгүй, эсхүл санал болгохгүй, тухайн баглаа боодлын иж бүрдлийг:**

- (1) Техникийн зааварчилгааны дагуу үйлдвэрлэсэн, бэлтгэсэн, тэмдэглэгээ хийсэн, үйлчилгээ хийсэн, нөхцөлийг сайжруулсан болон засварласан (аль тохирохоор);
- (2) Техникийн зааварчилгааны дагуу тест хийсэн;
- (3) Монгол Улсад үйлдвэрлэсэн баглаа боодлын иж бүрдлийн хувьд:
 - (i) итгэмжлэгдсэн эрх бүхий байгууллага тест хийсэн;
 - (ii) **7-р ангиллын аюултай бараанаас бусад нь Даргаар зөвшөөрөгдсөн;**
 - (iii) 7-р ангиллын аюултай бараа нь Үндэсний цацраг идэвхт материалын лабораториор зөвшөөрөгдсөн.
- (4) Монгол Улсад үйлдвэрлээгүй баглаа боодлын иж бүрдлийн хувьд, ИCAO-гийн Хэлэлцэн тохирогч Улсад үйлдвэрлэсэн ба тест хийсэн байх.

(b) Энэ зүйлийн (a)(3) болон (4) нь Техникийн зааварчилгаанд тест хийсэн байхыг шаардаагүй баглаа боодолд хамаарахгүй.

92.53. Баглаа боодлын иж бүрдлийн зөвшөөрөл

(a) Энэ дүрмийн 92.51(a)(3)(ii)-ын дагуу зөвшөөрөл авах, эсхүл сунгуулах хүсэлтийг, Техникийн зааварчилгааны дагуу баглаа боодлын иж бүрдлийн үзүүлэлтийн тестийн тайлангийн хамт Даргад хүргүүлэх ёстой.

(b) Энэ зүйлийн (a)-д заасан зөвшөөрлийг дараах тохиолдолд олгож болно, хэрэв:

- (1) тухайн баглаа боодлын иж бүрдлийн үзүүлэлтийн тестийн тайлан амжилттай үр дүн харуулж байгаа бол;
- (2) тухайн хүсэлт гаргагч нь дүрэмд заасан зохих хураамжийг төлсөн бол.

(с) Энэ зүйлийн (b)-гийн дагуу олгосон зөвшөөрөл нь:

- (1) 5 хүртэлх жилийн хугацаагаар олгож, эсхүл сунгаж болно;
- (2) хугацаа дуусах, эсхүл хүчингүй болгох хүртэл хүчинтэй хэвээр байна;
- (3) тухайн баглаа боодлын иж бүрдэлд Техникийн зааварчилгааны дагуу байрлуулах тэмдэглэгээг зааж өгнө.

92.55. Савлалтад тавих шаардлага

Аюултай барааг агаараар тээвэрлэхээр савлаж байгаа этгээд бүр нь:

- (1) тухайн барааг Техникийн зааварчилгааны дагуу савлана;
- (2) Техникийн зааварчилгаанд өөрөөр зааснаас бусад тохиолдолд, тухайн баглаа боодлын иж бүрдэлд дараах шаардлагыг бататгана;
 - (i) холбогдох тестэд заасны дагуу хэрэглэсэн болохыг;
 - (ii) савлах арга, түүний хэмжээ болон тест хийгдсэн аливаа дотоод баглаа боодлын иж бүрдлийн төрлийг хамруулан, тухайн загварын маягтай бүх талаар нийцэж байгааг.

92.57. Тэмдэглэгээнд тавих шаардлага

Агаараар тээвэрлэх аюултай барааг агуулсан баглаа боодол, эсхүл гадуур боодолд тэмдэглэгээ хийж байгаа этгээд нь тухайн баглаа боодол, эсхүл гадуур боодолд тэмдэглэгээг дараах хэлбэрээр хийнэ:

- (1) Техникийн зааварчилгааны дагуу;
- (2) дараах байдлаар:
 - (i) аюултай барааны оноосон нэр болон, хэрэв тохиромжтой бол, техникийн нэрийг нэмэлтээр;
 - (ii) тогтоосон бол, харилцан хамааралтай UN үсгээр эхэлсэн UN дугаар;
 - (iii) аюултай барааг агаараар тээвэрлэхийг санал болгосон тухайн этгээдийн болон хүлээн авагчийн нэр, хаяг;
 - (iv) Техникийн зааварчилгаанд заасан бусад тэмдэглэгээ.

92.59. Шошгонд тавих шаардлага

Агаараар тээвэрлэх аюултай барааг агуулсан баглаа боодол, эсхүл гадуур боодолд шошго тавьж байгаа этгээд нь дараах үүрэгтэй:

- (1) баглаа боодол, гадуур боодол бүрд Техникийн зааварчилгааны дагуу шошго тавих;
- (2) аюултай гэсэн шошго нэг бүр нь Техникийн зааварчилгааны дагуу тухайн аюулын жинхэнэ шинж чанарыг харуулж байгааг бататгах.

С Бүлэг - Аюултай барааг тээвэрлэлтэд санал болгох

92.101. Хамрах хүрээ

(a) Энэ Бүлэг нь аюултай барааг агаараар тээвэрлэхийг санал болгоход тавих шаардлагыг тогтооно.

(b) Аюултай барааг агаараар тээвэрлэхийг санал болгож байгаа этгээдийн өмнөөс энэ Бүлэгт шаардсан үйл ажиллагааг гүйцэтгэж байгаа этгээд нь тухайн үйл ажиллагааг энэ Бүлгийн дагуу гүйцэтгэнэ.

92.103. Аюултай барааг тээвэрлэлтэд санал болгох

Аюултай бараа агуулсан баглаа боодол, эсхүл гадуур боодлыг агаараар тээвэрлэхийг санал болгож байгаа этгээд нь дараах шаардлагыг бататгана:

- (1) тухайн аюултай барааг Техникийн зааварчилгааны дагуу агаараар тээвэрлэхийг хориглоогүй болохыг;
- (2) тухайн аюултай барааг энэ Бүлгийн дагуу баталгаажуулсан болохыг;
- (3) тухайн аюултай барааг В Бүлэгт заасан хэлбэрээр баглаж боосон, савласан, тэмдэглэсэн болон шошго зүүсэн болохыг;
- (4) Техникийн зааварчилгаанд шаардсан бол, тухайн аюултай бараанд 92.105-ын дагуу бүрдүүлсэн ба гарын үсэг зурсан аюултай барааны тээврийн баримт бичиг дагалдуулсан болохыг;
- (5) тухайн бараа нь Техникийн зааварчилгааг өөр хэлбэрээр хангасан болохыг.

92.105. Аюултай барааны тээврийн баримт бичиг

(a) Аюултай барааг агаараар тээвэрлэхийг санал болгож байгаа аливаа этгээд нь 92.103(4)-ийг харгалзан, 2 хувь үйлдэж, гарын үсэг зурсан аюултай барааны дараах тээврийн баримт бичгийг үйл ажиллагаа эрхлэгчид хүргүүлнэ:

- (1) дараах дарааллаар тухайн аюултай барааг зөв дүрсэлсэн:
 - (i) оноосон нэр;
 - (ii) ангилал, эсхүл тогтоосон бол, Ангилал 1-ийн хувьд, нийцлийн группийг багтаасан бүлэг (division);
 - (iii) хэрэв байгаа бол, UN үсгээр эхэлсэн UN дугаарыг;
 - (iv) тогтоосон бол, тохирох савлах групп;
- (2) аюултай барааг агаараар тээвэрлэхийг санал болгож байгаа этгээд гарын үсэг зурсан дараах мэдэгдлийг агуулсан:

Би, энэхүү илгээх барааны агууламжийг оноосон нэрээр бүрэн гүйцэт, нягт нямбай тодорхойлсон ба олон улсын болон үндэсний холбогдох хууль дүрэмд заасан тээвэрлэлтийн тохирох нөхцөлийн дагуу ангилсан, баглаж боосон, савласан, тэмдэглэсэн ба шошго / зурагт хуудас хэрэглэсэн болохыг мэдэгдэж байна.

- (3) Техникийн зааварчилгаанд заасан аливаа нэмэлт шаардлагыг хангасан;
- (b) Шаардлагатай тохиолдолд, энэ зүйлийн (a)(2)-т шаардсан мэдэгдэл нь холбогдох зурагт хуудсанд тусгагдсан ишлэлийг дурдахгүй байж болно.

D Бүлэг - Үйл ажиллагаа эрхлэгч

92.151. Хамрах хүрээ

- (a) Энэ Бүлэг нь дараах үйл ажиллагаанд тавих шаардлагыг тогтооно:
- (1) үйл ажиллагаа эрхлэгч аюултай барааг хүлээн авах, тээвэрлэлтэд бэлтгэх, хадгалах, ачаалах болон үзлэг хийх;
 - (2) үйл ажиллагаа эрхлэгч аюултай барааны талаар мэдээллээр хангах.
- (b) Үйл ажиллагаа эрхлэгчийн өмнөөс энэ Бүлэгт шаардсан үйл ажиллагааг гүйцэтгэж байгаа этгээд нь тухайн үйл ажиллагааг энэ Бүлгийн дагуу гүйцэтгэнэ.
- (c) Энэ Бүлгийг, үйл ажиллагаа эрхлэгчийг тодорхой эд зүйл, эсхүл бодисыг заавал тээвэрлэхийг шаардсан, эсхүл үйл ажиллагаа эрхлэгчийг тодорхой эд зүйл, эсхүл бодисыг тээвэрлэх тусгай шаардлагаас чөлөөлсөн гэж тайлбарлах үндэслэл болохгүй.

92.153. Аюултай бараа хүлээн авах

Үйл ажиллагаа эрхлэгч нь дараахаас бусад тохиолдолд, баглаа боодол, гадуур боодол, эсхүл Техникийн зааварчилгаанд зөвшөөрсөн бол, аюултай бараа агуулсан ачилтын нэгж төхөөрөмжийг агаараар тээвэрлэхээр хүлээн авахгүй:

- (1) Техникийн зааварчилгаанд тухайн баримт бичгийг шаардлагагүй гэж зааснаас бусад тохиолдолд, 92.105-д заасан аюултай барааны тээврийн баримт бичгийн 2 хувийг дагалдуулсан;
- (2) тухайн баглаа боодол, гадуур боодол, эсхүл ачилтын нэгж төхөөрөмжид:
 - (i) 92.163-ын дагуу үзлэг хийсэн;
 - (ii) 92.57 болон 92.59-ийн дагуу тэмдэглэгээ хийж, шошго зүүсэн.

92.155. Хүлээн авах шалгалт

Аюултай барааг агаараар тээвэрлэхээр хүлээн авч байгаа үйл ажиллагаа эрхлэгч нь:

- (1) дараах шаардлагыг бататгах хүлээн авах шалгах хуудсыг ашиглана:
 - (i) 92.153-ын шаардлага хангагдсан болохыг;
 - (ii) тухайн аюултай барааны тээврийн баримт бичиг нь 92.105-ын шаардлагыг хангасан болохыг.
- (2) хүлээн авах шалгалтын үр дүнгийн бүртгэлийг хөтөлнө;
- (3) энэ зүйлийн (2)-т шаардсан бүртгэлийг минимум 6 сарын хугацаанд хадгална.

92.157. Агаарын хөлөгт ачаалах хязгаарлалт

(a) Энэ зүйлийн (b)-д зааснаас бусад тохиолдолд, үйл ажиллагаа эрхлэгч нь аюултай барааг зорчигчтой агаарын хөлгийн бүхээгт, эсхүл агаарын хөлгийн нислэгийн бүхээгт тээвэрлэхгүй.

(b) Үйл ажиллагаа эрхлэгч нь:

- (1) хэрэв Техникийн зааварчилгааны дагуу хийхийг зөвшөөрсөн бол, зорчигч, эсхүл нисэх багийн гишүүнийг бүртгэгдсэн тээш, эсхүл гар тээшинд, эсхүл биедээ аюултай бараа авч орохыг зөвшөөрч болно;
- (2) хэрэв Техникийн зааварчилгаанд тусгайлсан баглаа боодлоор хийхийг зөвшөөрсөн бол, цацраг идэвхт материалыг зорчигчтой агаарын хөлгийн бүхээгт, эсхүл агаарын хөлгийн нислэгийн бүхээгт тээвэрлэхийг зөвшөөрч болно;
- (3) тухайн агаарын хөлөг В ангиллын ачааны тасалгаагаар тоноглогдоогүй үед, хэрэв орон нутгийн нислэг үйлдэх бол, дараах аюултай барааг зорчигчийн бүхээгийн ачааны хэсэгт тээвэрлэж болно:
 - (i) Ангилал 1, Бүлэг 1.4 Групп S-д хамаарах тэсрэмтгий бодис;
 - (ii) Ангилал 2, Бүлэг 2.2, шатамхай бус, хоргүй хий;
 - (iii) Ангилал 3, шатамхай шингэн /савлах Групп - III/;
 - (iv) Ангилал 4, Бүлэг 4.1- шатамхай хатуу бодис / савлах Групп - III/;
 - (v) Ангилал 5, Бүлэг 5.1- исэлдэгч бодис / савлах Групп - III/;
 - (vi) Ангилал 6, Бүлэг 6.1- хортой бодис / савлах Групп - III/;
 - (vii) Ангилал 7, минимум тусгаарлах зайг ханган ачсан цацраг идэвхт материал;
 - (viii) Ангилал 8, савлах Групп - III бодис;
 - (ix) Ангилал 9, бусад бараа.

(c) Үйл ажиллагаа эрхлэгч, хэрэв тухайн тасалгаа нь В ангиллын ачаа, эсхүл тээшний тасалгаанд тавих бүх гэрчилгээжүүлэлтийн шаардлагыг хангаж байгаа бол, зорчигч тээвэрлэж байгаа агаарын хөлгийн ачааны үндсэн тасалгаанд аюултай барааг тээвэрлэж болно.

(d) Аюултай барааг агаараар тээвэрлэхээр хүлээн авч байгаа үйл ажиллагаа эрхлэгч бүр нь “Зөвхөн ачааны агаарын хөлөг” гэсэн шошготой аюултай барааны баглаа боодлыг ачааны агаарын хөлөгт ачна.

92.159. Хоорондоо үл зохицох аюултай бараа

Аюултай барааг агаараар тээвэрлэхээр хүлээн авч байгаа үйл ажиллагаа эрхлэгч нь хоорондоо харилцан үйлчилснээр аюултай нөхцөл байдал үүсгэж болох аюултай бараа агуулсан баглаа боодлыг, гоожсон тохиолдолд, хоорондоо урвалд орж болох байрлалд, эсхүл хамт зэрэгцүүлэн байрлуулахгүй.

92.161. Ялгах, тусгаарлах болон хамгаалах

Аюултай барааг агаараар тээвэрлэхээр хүлээн авч байгаа үйл ажиллагаа эрхлэгч бүр нь:

- (1) хортой болон халдварт бодис агуулсан баглаа боодлыг Техникийн зааварчилгааны дагуу байрлуулна;
- (2) цацраг идэвхт материалыг Техникийн зааварчилгааны дагуу аливаа хүн, амьтан болон боловсруулаагүй гэрэл зураг, киноны хальснаас тусад нь байрлуулна;
- (3) агаарын хөлөгт ачсан тухайн аюултай барааг гэмтэхээс хамгаална;
- (4) аюултай барааг агаарын хөлөгт, тухайн баглаа боодлын байрлалыг өөрчилж болох нислэгийн аливаа хөдөлгөөнөөс сэргийлэх хэлбэрээр бэхэлнэ.

92.163. Ачаалах үеийн үзлэг шалгалт

Үйл ажиллагаа эрхлэгч нь:

- (1) дараахаас бусад тохиолдолд, агаарын хөлөгт, эсхүл ачилтын нэгж төхөөрөмжид аюултай бараа агуулсан баглаа боодол, эсхүл гадуур боодлыг ачихгүй:
 - (i) тухайн ачилтын өмнөх үзлэг хийгдсэн байх;
 - (ii) гоожсон, эсхүл гэмтсэн нотолгоо байхгүй;
- (2) ачилтын нэгж төхөөрөмж дараах шаардлагыг хангах хүртэл агаарын хөлөгт тухайн төхөөрөмжийг ачихгүй:
 - (i) тухайн ачилтын өмнөх үзлэг хийсэн байх;
 - (ii) түүнд агуулагдсан аливаа аюултай бараа гоожсон, эсхүл гэмтсэн нотолгоо байхгүй байх.

92.165. Буулгах үеийн үзлэг шалгалт

Аюултай бараа агуулсан баглаа боодол, эсхүл гадуур боодол тээвэрлэж байгаа үйл ажиллагаа эрхлэгч нь агаарын хөлгөөс, эсхүл ачилтын нэгж төхөөрөмжөөс тухайн баглаа боодол, эсхүл гадуур боодлыг буулгахдаа гоожсон, эсхүл гэмтсэн шинж тэмдэг байгаа эсэхэд үзлэг хийнэ.

92.167. Гэмтэл, эсхүл бохирдлыг арилгах

Агаарын хөлгөөс ачаа буулгах үед гэмтсэн, эсхүл гоожсон нотолгоо олж тогтоосон бол, тухайн үйл ажиллагаа эрхлэгч нь:

- (1) тухайн аюултай бараа, эсхүл ачилтын нэгж төхөөрөмж байрлаж байсан агаарын хөлгийн тухайн хэсгийн гэмтэл, эсхүл бохирдлыг шалгах үзлэг хийнэ;
- (2) аливаа аюултай бохирдлыг арилгана.

92.169. Халдварт бодис

Агаарын хөлөгт ачсан халдварт бодис агуулсан аливаа баглаа боодол гэмтсэн, эсхүл гоожсон байдалтай байвал, үйл ажиллагаа эрхлэгч нь:

- (1) тухайн баглаа боодлыг хөдөлгөхөөс зайлсхийнэ, эсхүл аль болох бага хөдөлгөнө;
- (2) дэргэдэх баглаа боодлын бохирдлыг шалгах үзлэг хийж, бохирдсон байж болох багцыг тусад нь тавина;
- (3) холбогдох эрүүл мэндийн эрх бүхий байгууллага, эсхүл мал эмнэлгийн эрх бүхий байгууллагад мэдэгдэх ба хүмүүст аюул учруулсан байж болох дамжин өнгөрсөн бусад орнуудад мэдээлэл хүргүүлнэ;
- (4) илгээгч, эсхүл хүлээн авагчид мэдээлнэ.

92.171. Цацраг идэвхт материал

Агаараар аюултай бараа тээвэрлэж байгаа үйл ажиллагаа эрхлэгч бүр нь, агаарын хөлөг цацраг идэвхт материалаар бохирдсон тохиолдолд:

- (1) тухайн агаарын хөлгийг үйлчилгээнээс яаралтай гаргаж зогсооно;
- (2) аливаа хүрч болох гадаргуугийн цацрагийн түвшин болон бохирдлын үлдэгдэл нь Техникийн зааварчилгаанд заасан хэмжээнээс хэтрэхгүй болж багасах хүртэл тухайн агаарын хөлгийг үйлчилгээнд гаргахгүй.

92.173. Хөлгийн даргыг мэдээллээр хангах

(a) Аюултай бараа тээвэрлэх үйл ажиллагаа эрхлэгч бүр нь тухайн агаарын хөлөг нисэн гарахаас өмнө, Техникийн зааварчилгааны дагуу тухайн аюултай бараатай холбоотой мэдээллийг агаарын хөлгийн даргад бичгээр хүргүүлнэ.

(b) Үйл ажиллагаа эрхлэгч нь, энэ зүйлийн (a)-д заасан мэдээлэл дараах шаардлагыг хангаж байгааг бататгана:

- (1) тухайн нислэгийн үед хөлгийн дарга ашиглахад бэлэн байх;
- (2) зориулагдсан маягтаар танилцуулсан байх.

(c) Энэ дүрмийн 92.105-ын дагуу аюултай барааны тээврийн баримт бичиг бүрдүүлсэн байхыг шаарддаг аюултай бараа тээвэрлэж байгаа үйл ажиллагаа эрхлэгч бүр, тухайн агаарын хөлөг нисэн гарахаас өмнө агаарын хөлгийн даргыг, тээвэрлэж байгаа аюултай бараатай холбоотой осол, зөрчлийн үед ашиглах онцгой нөхцөлийн хариу арга хэмжээний мэдээллээр хангана.

(d) Үйл ажиллагаа эрхлэгч нь энэ зүйлийн (c)-д шаардсан мэдээллийг тухайн нислэгийн үед хөлгийн дарга ашиглахад бэлэн байлгана.

(e) Үйл ажиллагаа эрхлэгч, нь энэ зүйлийн (c)-д шаардсан мэдээллийг дараах баримт бичгийн дагуу хүргүүлсэн болохыг бататгана:

- (1) хүчин төгөлдөр ICAO Doc 9481 Аюултай бараатай холбоотой агаарын хөлгийн зөрчлийн үед авах онцгой нөхцөлийн хариу арга хэмжээний зааварчилгаа; эсхүл
- (2) тухайн тээвэрлэж байгаа аюултай бараатай холбоотой төстэй мэдээллээр хангадаг бусад баримт бичиг.

92.175. Ажилтныг мэдээллээр хангах

Үйл ажиллагаа эрхлэгч бүр нь өөрийн ажилтан болон хамааралтай бол, тэдний үйлчилгээний агентыг аюултай бараа тээвэрлэхтэй холбоотой үүрэг хариуцлагаа хэрэгжүүлэхэд шаардлагатай дараах мэдээллээр хангана:

- (1) аюултай бараатай холбоотой үүссэн онцгой нөхцөлийн үед авах арга хэмжээний зааварчилгаа;
- (2) Техникийн зааварчилгаанд заасан бусад мэдээлэл.

92.177. Ачаа хүлээн авах байрлал дахь мэдээлэл

(a) Үйл ажиллагаа эрхлэгч бүр нь аюултай барааны тээвэрлэлтийн талаар олон нийтэд зориулсан анхааруулга мэдээллийг ачаа хүлээн авах байрлал бүрд байрлуулна.

(b) Энэ зүйлийн (a)-д заасан анхааруулга нь:

- (1) хүрэлцэхүйц тоотой байна;
- (2) ил харагдахуйц хэлбэрээр байрласан байна.

92.179. Зорчигчид зориулсан мэдээлэл

(a) Үйл ажиллагаа эрхлэгч нь агаарын хөлөгт авч орохыг хориглосон барааны төрлийг зорчигчид мэдээлэх үүрэгтэй.

(b) Энэ зүйлийн (a)-д шаардсан мэдээллийг дараах байдлаар хүргэсэн байх ёстой:

- (1) хүрэлцэхүйц тоо хэмжээтэй ба дараах байрлалд, ил харагдахуйц байрлуулсан анхааруулга:
 - (i) зорчигчийн тийз олгох болон тээш бүртгэх байрлал бүрд;
 - (ii) агаарын хөлөгт зорчигч орох талбай бүрд;
- (2) зорчигчийн тийзэнд, хэрэв тийз нь цахим хэлбэртэй бол, суудал захиалгын баталгаажуулалтын хэсэг хэлбэрээр.

92.181. Үйл ажиллагаа эрхлэгч аюултай барааг саатуулах

Үйл ажиллагаа эрхлэгч, 92.17-гийн дагуу Дарга саатуулсан байх ёстой гэж үзсэн аюултай барааг хураан авсан бол:

- (1) тухайн барааг Дарга өөрийн мэдэлд авах хүртэл аюулгүй хадгалах бүх боломжит урьдчилан сэргийлэх арга хэмжээг авна;
- (2) тухайн барааг Дарга үзлэг, тест, дүн шинжилгээ хийх, эсхүл нотолгоо болгох зорилгоор цаашид шаардлагагүй гэж мэдэгдсэн бол, саатуулсан барааг чөлөөлж болно.

Е Бүлэг - Сургалт**92.201. Хамрах хүрээ**

Энэ Бүлэг нь дараах этгээдийн аюултай барааны сургалтад тавих шаардлагыг тогтооно:

- (1) аюултай барааг тогтмол илгээгч болон түүний үйлчилгээний агентын;
- (2) үйл ажиллагаа эрхлэгчийн;
- (3) аюултай барааг агаараар тээвэрлэхээр хүлээн авах үйлчилгээний агентын;
- (4) үйл ажиллагаа эрхлэгчээс бусад, зорчигч, эсхүл ачааг агаараар тээвэрлэх, эсхүл бэлтгэх ажиллагаанд оролцдог байгууллага болон этгээдийн;
- (5) зорчигч болон түүний тээшинд аюулгүйн хамгаалалтын үзлэг шалгалт хийдэг байгууллагын.

92.203. Аюултай барааны сургалтын хөтөлбөр

(а) ИНД-119-ийн дагуу олгосон агаарын тээвэрлэгчийн гэрчилгээ эзэмшигч, эсхүл гэрчилгээ эзэмшигчийн үйлчилгээний агент нь, агаараар тээвэрлэхээр зорьж байгаа аюултай бараатай холбоотой үүрэг гүйцэтгэхээр томилогдсон ажилтан дараах байгууллагын зохион байгуулсан, Хавсралт А-ийн дагуу 92.205-д заасан давтан сургалтыг багтаасан аюултай барааны сургалтын хөтөлбөрийг амжилттай төгссөн болохыг бататгах үүрэгтэй:

- (1) ИНД-119-ийн дагуу олгосон агаарын тээвэрлэгчийн гэрчилгээ эзэмшигч, хэрэв тухайн гэрчилгээ нь аюултай барааны сургалт зохион байгуулахыг зөвшөөрдөг бол; эсхүл
- (2) ИНД-141-ийн дагуу олгосон нисэхийн сургалтын байгууллагын гэрчилгээ эзэмшигч, хэрэв тухайн гэрчилгээ нь аюултай барааны сургалт зохион байгуулахыг зөвшөөрдөг бол.

(b) Агаарын тээвэрлэгчийн гэрчилгээ эзэмшигч, эсхүл тухайн гэрчилгээ эзэмшигчийн үйлчилгээний агентаас бусад этгээд нь, агаараар тээвэрлэхээр зорьж байгаа аюултай бараатай холбоотой үүрэг гүйцэтгэхээр томилогдсон ажилтан дараах эзэмшигчийн зохион байгуулсан, хэрэв хамааралтай бол, Хавсралт А-ийн дагуу 92.205-д заасан давтан сургалтыг багтаасан аюултай барааны сургалтын хөтөлбөрийг амжилттай төгссөн болохыг бататгах үүрэгтэй:

- (1) ИНД-141-ийн дагуу олгосон нисэхийн сургалтын байгууллагын гэрчилгээ, хэрэв тухайн гэрчилгээ нь аюултай барааны сургалт зохион байгуулахыг зөвшөөрдөг бол; эсхүл
- (2) олон улсын агаарын тээвэрлэгчдийн холбооны аюултай барааны сургалтын хөтөлбөрийн хүчинтэй итгэмжлэгдсэн гэрчилгээ.

(c) Гадаад улсад үйл ажиллагаа явуулж байгаа Монгол Улсын бүртгэлтэй агаарын хөлгөөр үйл ажиллагаа эрхлэгчийг, хэрэв агаарын хөлөгт ачих болон буулгах үйл ажиллагааг тухайн улсын дараах ажилтан гүйцэтгэж байгаа бол, энэ зүйлийн (a)-ийг дагаж мөрдөхийг шаардахгүй:

- (1) 92.203-ын дагуу тухайн сургалтын шаардлагыг хангасан этгээд хяналт тавьж байгаа; эсхүл
- (2) тухайн Улсын шаарддаг аюултай барааны сургалтыг хөтөлбөрийг амжилттай төгссөн; эсхүл
- (3) дараах байгууллагын зохион байгуулсан аюултай барааны сургалтын хөтөлбөрийг амжилттай төгссөн:
 - (i) Олон улсын агаарын тээвэрлэгчдийн холбооны шугамын агаарын тээвэрлэгчийн гишүүн өөр үйл ажиллагаа эрхлэгч; эсхүл
 - (ii) Олон улсын агаарын тээвэрлэгчдийн холбооны, аюултай барааны сургалтын хөтөлбөрийн хүчинтэй, итгэмжлэгдсэн гэрчилгээ эзэмшигч.

(d) Монгол Улсад үйл ажиллагаа явуулж байгаа Гадаад Улсын бүртгэлтэй агаарын хөлгөөр үйл ажиллагаа эрхлэгч, эсхүл үйлчилгээний агентыг, хэрэв аюултай бараатай холбоотой ажил үүрэг гүйцэтгэх ажилтан нь агаарын хөлгийн бүртгэгч Улсын шаарддаг аюултай барааны сургалтын хөтөлбөрийн дагуух сургалтад амжилттай хамрагдсан бол, энэ зүйлийн (a)-ийг дагаж мөрдөхийг шаардахгүй.

92.205. Давтан сургалт

Энэ дүрмийн 92.203-т шаардсан аюултай барааны сургалтын хөтөлбөрийн дагуух сургалтад хамрагдсан этгээд бүр нь:

- (1) тухайн хөтөлбөрт хамрагдсанаас хойш 2 жилийн дотор, аюултай барааны давтан сургалтын хөтөлбөрт хамрагдана;
- (2) 2 жилээс хэтрэхгүй хугацааны давтамжтайгаар аюултай барааны давтан сургалтын хөтөлбөрт дахин хамрагдана.

92.207. Ажилтны хувийн хэрэг

(a) Энэ Дүрэм хамаарах этгээд бүр нь аюултай бараатай холбоотой ажил үүрэг гүйцэтгэхээр томилогдсон ажилтан нэг бүрийн хувийн хэргийг, тэдний ажиллаж байгаа бүх хугацааны турш хадгална.

(b) Энэ зүйлийн (a)-ийн дагуу хадгалах шаардлагатай хувийн хэрэгт ажилтан нэг бүрийн дараах мэдээллийг тусгасан байна:

- (1) хамрагдсан анхан шатны сургалтын хөтөлбөр болон сүүлчийн давтан сургалт;
- (2) сургалтад хамрагдсан он сар өдөр;
- (3) сургалтыг зохион байгуулсан этгээд болон байгууллагын нэр;
- (4) сургалтын үр дүн болон олж авсан ур чадвар.

Хавсралт А - Аюултай барааны сургалтын хөтөлбөр

Аливаа этгээдийн хамрагдсан аюултай барааны сургалтын хөтөлбөр нь тухайн этгээдэд оногдох аюултай бараатай холбоотой ажил үүрэгт тохирсон байх ба дараах сургалтыг багтаана:

- (1) ерөнхий танилцах сургалт - ерөнхий заалттай танилцуулах зорилготой;
- (2) үйл ажиллагааны-тусгай сургалт - тухайн хүний хариуцах үйл ажиллагаанд холбогдох шаардлага бүрийг нарийвчлан өгөх сургалт;
- (3) аюулгүй байдлын сургалт-тухайн аюултай бараанаас үүдэлтэй аюул, аюулгүй ажиллах болон онцгой нөхцөлийн үед авах арга хэмжээний журмыг багтаасан;
- (4) Техникийн зааварчилгааны Part 1, Chapter 4-ийн (TRAINING) дагуу дараах холбогдох сэдвийн сургалт:

Хамрагдах ажилтан	Сэдэв
Үйл ажиллагаа эрхлэгчийн хүлээн авах ажилтан	Монгол Улсын хууль, дүрэм; аюултай барааны ангилал; хориг; савлалтад тавих зааварчилгаа; шошго болон таних тэмдэг тавих; аюултай барааны тээврийн баримт бичиг, үйл ажиллагаа эрхлэгчийн хариуцлага; илгээгчийн хариуцлага; онцгой нөхцөлийн журам
Аюултай барааны газрын үйлчилгээний хадгалалт болон ачилтад оролцдог ажилтан	Ерөнхий философи; шошго болон таних тэмдэг тавих; тээвэрлэх болон ачих журам; хоорондын нийцэл; онцгой нөхцөлийн журам
Зорчигч үйлчилгээний ажилтан болон зорчигч болон ачаа тээшинд аюулгүйн үзлэг хийх аюулгүйн хамгаалалтын ажилтан	Ерөнхий философи; Монгол Улсын хууль, дүрэм; хориотой аюултай бараа; зорчигчид үл хамаарах; шошгоны ерөнхий таних тэмдэг
Нисэх багийн гишүүд	Ерөнхий философи; Монгол Улсын хууль, дүрэм; шошго болон таних тэмдэг тавих; нисгэгчид мэдээлэх; онцгой нөхцөлийн журам; хоорондын нийцэл; ачих журам
Нисэх багийн гишүүдээс бусад багийн гишүүд	Ерөнхий философи; Монгол Улсын хууль, дүрэм; хориотой аюултай бараа; зорчигчид үл хамаарах; шошгоны ерөнхий таних тэмдэг; онцгой нөхцөлийн журам
Баглагч	Аюултай барааны ангилал; аюултай барааны жагсаалт; савлалтад тавих ерөнхий шаардлага; дүйцэх шаардлага; савлахад тавих тусгай зааварчилгаа; шошго болон таних тэмдэг тавих
Тогтмол илгээгч болон түүний үйлчилгээний агент	Аюултай барааны ангилал; хориотой аюултай барааны жагсаалт; савлахад тавих зааварчилгаа; шошго болон таних тэмдэг тавих; илгээгчийн хариуцлага; аюултай барааны тээврийн баримт бичиг

--oOo--